

Z cyklu - felietónowé wiérztë - 49

A mariczné! Ale sěpie!
W biôłim pierzchù drzewiãt czëpë
W łózkù mili, cepli nama
Zdrzimë na swiat za rutama...

W radio pùszczają christmasë
A ma kôrbima timczasã
Ò tim, co je do zrobieniô
Ò pòżëczkach do spłaceniô...

Ò wilëji, ò darënkach
Żëczbë płëną w esemesach
Co ùpieczesz, co napiszã
Co na Gòdë, co jesz dzysô...

Stótczci nowé grzejã rzëce
Propagańda wcyg w robòce
A cëż czëc w brukselsczim cyrkù?
Bierzã wòlnosc pò përzinkù

Za na bórdzi wzãté dëtczi
Wprowôdzają rząd niemiecczi
Jo, tej chcemë czwiczëc słówka:
Eine kleine Samòstójka...

W Gduńskù białka wòjewòdã,
Co pòrządzëc chłopóm nie dô
Nòpiérwi miéniô kùnuszczci
A tej pòùprawi mùszczci...

Chòdzã z gwizdzama pò Slëpskù
A z panëszkama pò Pëckù
Żëdzë sąsòdów zôs tlëkã
A kòl nas za òknã sěpie...

Tómk Fópka, Chwaszczëno, 22 gòdnika 2023 rokù, gòdz. 3.01 p.p.